



### **Scoula cumünala - elecziun mainascoula**

Il mainascoula da la scoula Zernez ha desdit sia piazza sülla fin da l'on da scoula 2016/2017. Sün proposta dal cussagl da scoula ha la suprastanza cumünala confermà l'elecziun da Jon Candrian sco nouv mainascoula. Jon Candrian es actualmaing magister secundar illa scoula da Zernez e surpiglia a partir da l'on da scoula 2017/2018 quista nouv'incumbenza.

### **Sviamaint Susch – decisun da princip**

In december 2016 d'eira la suprastanza cumünala gnüda orientada da l'uffizi da construcziun bassa sur da las trais variantas pel sviamaint da Susch, cha l'uffizi vaiva evaluà e congualà. Tenor ils differents criteris da valütaziun da l'uffizi da construcziun bassa resulta la varianta cun ün tunnel cuort sco varianta la plü adattada. Il departamaint chantunal ha in seguit decis da vulair perseguitar inavant be quista varianta, e be scha'l Cumün da Zernez sustegna eir tala. La suprastanza cumünala ha congualà e pasà giò tuot ils argumaints per e cunter las singulas variantas ed es finalmaing gnüda a la conclusiun chi nu resta oter co da sustgnair la varianta favurizada dal departamaint chantunal. Quai per na periclarar insomma tuot il proget. Be cun sustgnair quista varianta pudess il sviamaint gnir progettà e realisà d'ürant ils prossems ons. D'üna vart as fa ferm pissers pel svilup dal trafic in cumün ed as vuol uschè davo tants ons da stüdis finalmaing realisar il sviamaint. Da l'otra vart as fa la suprastanza eir ferm pissers per la giardinaria, causa cha'l traget dal sviamaint tanghescha üna part da tala. Quia as spera da pudair chattar üna soluziun chi cuntainta a tuot ils pertocs.

### **Proget d'incablamaint "Netzentwicklung Engadin"**

Il proget d'incablamaint da lingias e cabels da forz'electric tanter Pradella e La Punt as rechatta actualmaing illa fasa da's cunvgnir tanter tuot ils partenaris a regard ils detagls da la collavuraziun. La suprastanza ha approvà ün contrat tanter la Swissgrid AG e la Corporaziun Energia Engiadina CEE chi regla las masüras da cumpensaziun economicas in connex cul proget da la lingia d'ota tensiun tanter Pradella e La Punt.

### **Veicul per la gruppa forestala**

Il veicul per la gruppa forestala es vegl e sto gnir rimpazzà. Il credit d'investiziun necessari per l'acquist d'ün veicul nouv es gnü concess.

### **Olimpia 2026**

Tuot ils cumüns in Grischun sun gnüts contactats a regard la dumonda per far part al comité Grischun da campagna per la candidatura da l'olimpiada 2026 e per sustgnair il comité cun ün import finanziel. Cun la motivaziun chi nu das-cha gnir fat adöver da raps dals pajaders d'impostas per sustgnair campagnas da votaziun, ha la suprastanza refüsà la dumonda per üna partecipaziun al comité ed eir per üna partecipaziun finanziaria a favur da la candidatura per l'olimpiada 2026.

### **Statistica sezzüdas, radunanzas e votaziuns 2016**

Il chanzlist ha orientà a la suprastanza sur da la quantità da sezzüdas e tractandas da l'on 2016. La direcziun operativa ha trattà 583 tractandas in 26 sezzüdas. La suprastanza cumünala ha salvà 17 sezzüdas e trattà 247 affars. In duos radunanzas cumünalas han votantas e votants decis sur da nouv tractandas. Votaziuns a l'urna sül nivel cumünal nun haja d'ürant il 2016 dat ingünas.